

四庫全書

史部

欽定四庫全書

史部

皇朝文獻通考卷一百三十五至
三十七

府丞_臣龔驂文覆勘

總校官中書_臣孫溶

續文獻通考

皇朝文獻通考卷一百三十五

王禮考

皇子親王以下婚儀 公主以下嫁儀

臣等謹按馬氏帝系考于公主門載下嫁儀而皇子門不及婚禮今考唐開元禮有親王納妃儀宋政和中儀禮局上皇子納夫人儀而馬氏俱未收人似嫌缺畧今據

大清會典通禮所述

皇子親王以下婚儀公主以下嫁儀著於王禮考
皇子婚儀凡

皇子指婚內務府豫劄欽天監諏吉日並列大臣命
婦中偕老者奏襄婚事既得

旨以告于福晉家屆期贊事大臣偕福晉父蟒袍補服
詣

乾清門東階下福晉父北面跪贊事大臣西面稱有

旨今以某氏女作配與皇子某為福晉福晉父承
旨訖行三跪九叩禮退

右指婚

迺訓吉納幣內務府備黃金項環一釵六珥六均
以珠飾釧四黃金衣鈕百白金衣鈕二百黑貂皮
三貂皮百有四十狐皮二百有五十黑獺皮七采
幣表裏各百棉三百斤

賜福晉父母黃金十兩白金七百兩貂冠狐裘佩帶刀

悅鞞襪具馬二匹鞍轡具屆日內務府以采亭載
諸禮物如福晉家福晉父朝服迎于大門外內務
府官入陳幣于堂陳馬于庭陳

賜物於階上以納幣告福晉父祇受訖率其子弟序立
庭東福晉母率諸婦出序立庭西望

闕行三跪九叩禮內務府官退福晉父送於大門外
如初迎禮

右納幣

是日所司備伶樂一部燕席五十罇罇卓五十張
酒五十瓶羊三十有六詣福晉家設內外筵燕外
燕于廳事東西布席相向北上福晉親族職官及
不入直之公侯伯內大臣侍衛一二品官朝服畢
會午刻鴻臚寺官引入升堂福晉親族及本旗大
臣侍衛東位西面各旗公侯伯等官西位東面就
席一叩序坐司茶奉茶衆受茶飲茶皆一叩司筵
奉果食酌酒伶工入奏衆獻酬樂闋興出司筵徹

果食衆易蟒袍補服仍入就位司筵奉饌酌酒奏
樂獻酬交錯樂闋興鴻臚寺官引衆官詣堂下望
闕北面序立聽贊行三跪九叩禮興退內燕於中堂
福晉親屬諸婦及一二品命婦咸會內務府管領
妻量人給事行酒如外堂燕儀

右納幣燕會

及婚前一日福晉家豫以妝奩送

皇子宫鋪陳居日質明

皇子蟒袍補服詣

皇太后

皇帝

皇后前行禮若

妃嬪所出並於

妃嬪前行禮各如儀內務府選隨從女官八人豫詣

福晉家閣前祇俟贊事命婦豫詣

皇子宮內別室祇候自

宮門至于福晉家步軍統領飭屬灑掃清道鑾儀衛
備儀仗采輿內務府總管一人官屬二十人蟒袍
補服護軍四十人偕如福晉家奉迎及大門主人
迎入如納幣禮升輿吉時屆內鑾儀校奉采輿陳
於中堂福晉禮服出閣隨從女官翊升輿母送于
閣門外姑姊妹戚屬送于輿前俟下簾退父率子
弟送于門俟過退內校舁采輿行鐙八炬十為前
導女官隨從出大門乘馬前列儀仗內務府總管

率屬及護軍前後導護行至

紫禁城門外衆下馬步入及儀仗止于宮外女官隨
采輿入至

皇子殿前降輿女官導福晉出輿引入宮合卺吉時
屆贊事命婦上合卺酒設燕

皇子與福晉行合卺禮執事者皆退是日于

皇子宮近處張幕結綵燕福晉父母戚屬羣官如納
幣之儀

右奉迎合登

婚禮既成翼日

皇子及福晉夙興朝服內務府管領妻二人導詣

皇太后

皇帝

皇后前行朝見禮

皇子三跪九叩福晉六肅三跪三叩若

妃嬪所出次詣所出

妃嬪前行禮

如遇

聖駕行幸駐蹕俟

回鑾擇吉行禮

右朝見

既婚之九日行歸寧禮

皇子偕福晉至福晉家福晉第設宴畢皆還率不過

午

右歸寧

皇孫

皇曾孫婚儀凡

皇孫

皇曾孫指婚由內務府辦理會同禮部具奏後禮部
傳行齊集既分府即傳行於府第齊集

皇孫娶福晉初定禮用金約領一大金簪三小金簪
三金珥六金釧四金衣鈕百銀衣鈕二百製衣貂

皮一百有四十製帽貂皮三衾褥狐皮二百有五
十緣朝服海龍皮七采幣表裏八十棉二百五十
觔

皇曾孫娶福晉初定禮用金約領一大金簪三小金
簪三金珥二金釧四金衣鈕六十銀衣鈕百三十
製衣貂皮一百有四十製帽貂皮三製衾褥狐皮
二百有五十緣朝服海龍皮七采幣表裏五十棉
一百七十觔

皇孫婚禮初定日設宴三十席餽餽卓三十張酒四十瓶羊二十六成婚日設宴四十席餽餽卓四十張酒四十瓶羊三十五

皇曾孫婚禮初定日設宴十六席餽餽卓十四張酒十六瓶羊十二成婚日設宴二十席餽餽卓二十張酒二十瓶羊十六

其餘均如

皇子儀

親王婚儀

為未分家
之子娶同凡

親王將及冠訪朝臣女或外藩王女年齒相當者奏

聞請

旨

命下以次行禮如奉

旨賜婚者是日王朝服詣

太和殿前謝

恩如儀初定王府備燕五十席酒五十尊若聘外藩女

用鞍馬甲冑白金器七九牲五九使官屬之長齋
如女家禮請親王以下輔國公以上公主福晉以
下郡君貝子夫人以上禮部轉傳公侯伯以下侍
郎男以上畢會燕男布席于外堂女布席于內堂
獻酬行酒如

皇子初定婚燕儀

右定婚

次行納幣禮王府備黃金項飾一金珥一具金釵

大小各三指環十均綴以珍珠采繒衣裳九襲衾
褥七具黃金二十兩白金千兩給女父母朝衣一
冠帶鞞具采衣裳各一金珥一具鞍馬二若聘外
藩親王女用鞍馬十有二甲冑十有二閑甲二十
有四繒六十布六百白金器三具聘郡王貝勒台
吉女白金器同鞍馬甲冑各減二閑甲減四繒十
布減百餘物與上同王府官公服齋詣福晉家主
人公服迎入使者陳禮物于堂有馬則陳于庭以

納幣告主人拜受使左右徹之送使者如禮

右納幣

婚前一日女家豫以妝奩送王府鋪陳至日王禮服俟于次使其長史率官屬備儀仗禮輿如福晉家迎升輿吉時居納禮輿于中堂福晉禮服出閣送女者翊升輿母送于閣門外姑姊妹戚屬送于輿前父送於外堂子弟送于門外燈炬前導送女者升車從詣王府由中門入及堂前降輿王出次

俟于堂送女者尊福晉出與王揖先入福晉從入室行合卺禮其日王府設燕席六十酒六十尊聘外藩女用牲五九親王以下侍郎男以上公主福晉以下郡君貝子夫人以上咸會如定婚燕禮饋贈外藩王貝勒台吉及福晉夫人等送女來者冬夏衣各一襲貂裘一帶一弓一韋矢一服甲冑各一鞍馬二采繒三十布二百白金罷三具女之兄弟時衣一襲給隨從男婦三十人衣服有差

右成婚

若奉

旨賜婚者成婚之明日王及福晉夙興朝服詣

大內謝

恩行禮如

皇子婚儀

右謝恩

世子郡王婚儀凡世子郡王納幣用指環八米繒

衣裳八襲衾褥六具黃金十兩白金七百兩初燕
席四十酒四十尊婚燕席五十酒五十尊餘物與親
王同若聘外藩親王女鞍馬甲冑繒帛白金器如
親王聘外藩郡王女之數婚禮既成饋贈外藩親
王郡王及福晉送女來者並女之兄弟及隨從男
婦衣服均如親王例外藩貝勒台吉及夫人送女
來者給采繒二十有五布百有五十白金器二具
餘如親王例給隨從男婦二十有五人衣物有差

凡婚儀與親王同

長子貝勒婚儀凡長子貝勒婚禮納幣用指環六
采繒衣裳七襲衾褥五具黃金五兩白金五百兩
給女父母繒衣不綴采鞍馬一閑馬一餘物與郡
王同初燕席三十酒三十尊婚燕席四十酒四十
尊郡王以下尚書子爵以上郡主郡王福晉以下
郡君貝子夫人以上咸會燕儀同郡王若聘外藩
女定婚用鞍馬甲冑繒布白金器五九筵燕用牲

三九納幣用鞍馬八甲胄各八閑甲十有六繒四十布四百白金器二具婚燕用牲五九婚禮既成饋贈外藩親王郡王及福晉送女來者並女之兄弟及隨從男婦衣服均如郡王例貝勒台吉夫人送女來者給采繒繒合二十有五布百有五十白金器二具餘如郡王例隨從男婦二十人給衣物有差凡婚儀與郡王同

貝子婚儀凡貝子婚禮納幣用指環四釵大小各

二衣裳六襲不綴金珠衾褥四具白金四百兩給
女父母視貝勒減閑馬一餘衣物數同初燕婚燕
席酒各減十貝勒以下公以上暨本旗官屬郡君
貝勒夫人以上縣君輔國公夫人以上咸會燕儀
同貝勒若聘外藩女定婚鞍馬甲冑繒布白金器
三九筵燕用牲二九納幣鞍馬六甲冑各六閑甲
十有二繒三十布三百白金器二具婚燕用牲三
九饋贈親王郡王及福晉送女來者女之兄弟及

隨從男婦衣服均如貝勒例貝勒台吉夫人送女
來者給采繒繒合十有五布七十白金器一具餘
如貝勒例隨從男婦十有五人給衣服有差凡婚
儀與貝勒同

宗室公婚禮儀凡鎮國公婚禮納幣用衣裳五襲白
金三百兩初燕十有八席酒十有八尊婚燕二十
有八席酒二十有八尊貝子以下奉國將軍以上
貝子夫人以下奉國將軍淑人以上及本府官屬

會燕餘並同貝子若聘外藩女定婚鞍馬甲冑繒
布白金器二九筵燕用牲數如之納幣鞍馬五甲
冑各五閑甲十繒二十有五布二百五十白金器
二具婚燕用牲三九饋贈送女來者衣物如貝子
例輔國公納幣衣裳減一襲衾褥減一具無白金
初燕十有六席酒十有六尊婚燕二十有六席酒
二十有六尊貝子貝子夫人不會燕餘儀物與鎮
國公同若聘外藩女定婚行一九禮初燕用牲二

九納幣甲冑各減一閑甲減二繒減五布減五十白金器二具婚燕用牲三九饋贈送女來者衣物如鎮國公例凡婚儀均與貝子同

宗室將軍婚儀鎮國將軍納幣用衣裳繒三襲布一襲衾褥繒二具布一具金項飾一釵二珥二初燕用牲六婚燕席十有五餘儀與輔國公同輔國將軍納幣衣裳衾褥各減繒一初燕減牲一婚燕減五席奉國將軍納幣禮物如輔國將軍初燕復

減一牲婚燕減二席餘如鎮國將軍之禮儀同

閑散宗室婚儀凡閑散宗室納幣數如奉國將軍減金釵二初燕牲二婚燕六席閑散覺羅婚燕五席餘同宗室婚儀均與奉國將軍同

公主下嫁儀凡公主係

皇后所生為固倫公主壻為固倫額駙品級與固山貝子同係

妃所生為和碩公主壻為和碩額駙品級與超品公

同本部於指婚後奏請

欽定額駙品級並分別用帽頂朝服坐褥等項行文該
旗知會額駙若外藩行理藩院知會行內務府備
公主帽頂朝服首飾行工部備儀仗轎車知會宗
人府吏部戶部兵部一體遵照凡固倫公主初定
日成婚日筵宴二次和碩公主初定日筵宴一次
其初定成婚各事宜均同

乾隆四十年正月

諭曰下嫁蒙古王公之公主等所生之子本各有應得
品級毋庸另為辦理嗣後在京公主所生之子至十
三歲時如係固倫公主所生即給予伊父固倫額駙
品級和碩公主所生即給予伊父和碩額駙品級著
為例七月又奉

諭曰三阿哥之格格指與丹巴多爾濟為婚完姻在邇
恐伊等念係朕之孫女於一切典禮俱按公主一體
舉行亦未可定朕之孫女較之公主又隔一輩自不

應按照公主仍行主僕之禮卽如扎拉豐阿所尚係
皇祖之孫女伊於姑前如何行禮之處三阿哥之格格自
應仿照而行如果能按家禮克盡婦道朕方為之欣
悅倘必欲固執以為朕之孫女應照公主禮相待反
與朕之施恩指婚本意不合再羅卜藏多爾濟之子
旺親已穆巴爾曾將五阿哥之格格指與為婚俟完
姻時亦應一體遵行嗣後朕之孫女指婚後俱照宗
室格格禮行毋違朕諭

凡公主下嫁之禮內務府豫劄欽天監訊指婚吉日並列大臣命婦中偕老者奏襄婚事既得

旨禮部以告于額駙家居期贊事大臣偕額駙蟒袍補服詣

乾清門東階下額駙北面跪贊事大臣西面稱有旨今以某公主擇配某人額駙祇受

命行三跪九叩禮興退

右指婚

初定諏日額駙家備駝一馬八羊八十有一酒九十尊居期詣

午門前恭進得

旨分納所司是日光祿寺官備筵燕武備院官張黃幔於

中和殿北階下內務府陳金器反坫禮部理藩院尚書侍郎內務府總管光祿御同視布席設

御筵于

保和殿

寶座前正中

殿內東西布席各五行前引大臣一行內外親王世子固倫額駙二行郡王貝勒貝子公和碩額駙三行內大臣一等台吉四行都統副都統二等台吉五行相向北上

寶座後東西為豹尾班侍衛席又西為記注官席均南向

殿門外檐下東為侍衛席西為三等台吉席禮部尚書侍郎席黃幔左內務府總管席黃幔右均東西向樂部陳中和韶樂于

保和殿檐下陳丹陛樂于

中和殿後階均北向午刻

欽命八燕之王大臣侍衛及執事各官蟒袍補服畢會

保和殿前按翼序立理藩院尚書侍郎率額駙父額駙及其族人朝服詣

慈寧宮門外鴻臚寺官引至東階下北面行三跪九叩禮

畢引詣

保和殿前入班序立禮部尚書侍郎赴

乾清門奏時

皇帝龍袍補服乘輿出宮前引後扈如常儀

御保和殿

陞座鴻臚寺官引額駙父等出班北面聽贊行三跪九叩禮興王公以下就位額駙父等均引入班就位

跪叩坐

賜茶畢進爵大臣進

皇帝酒跪叩如

太和殿燕禮額駙父等出

殿外北面隨跪叩興復位徧爵作樂升歌行酒儀注
均與

太和殿燕禮同燕畢引額駙父等詣丹陛拜位行禮
如初

皇帝還宮衆退理藩院尚書侍郎鴻臚寺官引額駙父等至

乾清門西階下序列行三跪九叩禮退是日內監設中和韶樂及丹陛樂于

慈寧宮常次如儀尚膳女官設

皇太后筵于

寶座前南向設

皇后筵于東西南向又以次設

皇貴妃

貴妃

妃

嬪席于東西少後僉南向額駙母及其族中諸婦席于
嬪席之下少南西位東面進爵命婦席于丹陛下東
位西面午刻

皇后率

皇貴妃

貴妃

妃

嬪諸

慈寧宮

皇太后陞寶座筵燕

賜茶進觴徧爵作樂升歌行酒額駙母及諸婦行禮各

如儀燕畢

皇太后還宮

皇后

皇貴妃

貴妃

妃

嬪皆還內宮內監引額駙母及諸婦詣

皇后宮行六肅三跪三叩禮退

右初定會燕

下嫁前一日額駙蟒袍補服率族人詣

皇太后

皇帝

皇后宮門前行三跪九叩禮各如儀內務府官率鑾儀
校以公主妝奩詣額駙邸第內管領命婦二人偕
女侍隨往鋪陳至日黎明額駙家備九九禮物丈
馬十有八鞍轡具馱甲十有八馬二十有一駝六
羊八十有一酒九十尊詣

午門恭納午刻筵燕于

保和殿

慈寧宮如初定禮是日所司豫奏請王福晉貝勒貝子夫人中結髮偕老者

欽命陪送內務府大臣命婦二人內管領命婦十人充導從皆盛服于宮門外別室祇候贊事命婦豫詣額駙邸別室祇候自公主所出宮門至額駙邸步軍統領飭屬灑掃清道鑾儀衛備仗采輿內務府總管一人官屬四人內管領二人護軍叅領二人

護軍校二人繡袍補服偕護軍二十人于所出宮
門前祇候升輿吉時居公主吉服詣

皇太后

皇帝

皇后前行禮若

妃嬪所出並于

妃嬪前行禮各如儀畢命婦翊升輿下簾內校舁輿
行出宮儀仗前列鐙八炬十前導陪送福晉夫人

及隨從命婦乘車隨行內務府總管內管領乘騎
稍遠導從叅領及護軍乘騎護行詣額駙邸第及
門衆下馬步入儀仗止及儀門各官止與入至廳
事正中降輿命婦階下降車升堂導公主出輿福
晉夫人降車隨公主入室額駙父乃禮賓于外堂
額駙母禮女賓于中堂徧饗諸執事者各如禮合
卺吉時屈贊事命婦上合卺酒設燕額駙與公主
行合卺禮衆退

右于歸合巹

下嫁禮成翼日行朝謝禮公主額駙夙興朝服公
主詣

皇太后

皇帝

皇后及所出

妃嬪前行禮額駙詣

慈寧門外東階下

乾清門外

內右門外行禮各如儀畢還邸第

右朝謝

至於九日歸寧欽天監選擇吉日內務府具奏事宜禮部具奏儀注

乾隆十二年正月奏准向例公主九日歸寧後欽天監另擇吉行謝

恩禮伏思歸寧之日係釐降後初次瞻仰應謝

恩嗣後公主九日歸寧時即行謝

恩禮

右歸寧

郡主出嫁儀凡格格嫁朝臣者額駙不進初定禮
進成婚禮由禮部具奏嫁外藩者應進初定禮物
成婚禮物由理藩院具奏均於

午門前納進交該衙門接收凡王公之女匹配外藩
者准其請封並給與俸祿銀緞其住居京城匹配

八旗世家者惟

世祖章皇帝天潢支派准其照王公品級封給郡主縣主及郡主額駙縣主額駙等按品食俸至遠派王公之女俱照例封給虛銜毋庸復給銀米凡皇孫女及王公之女

大內聘嫁者內務府奏請格格品級及初定禮成婚禮日期知會禮部轉行該衙門知會額駙家預備成婚前期禮部奏請額駙品級郡主視郡王福晉

額駙視武職一品縣主視貝勒夫人額駙視武職
二品郡君視貝子夫人額駙視武職三品縣君視
鎮國夫人額駙視武職四品鄉君視鎮國將軍夫
人額駙視武職五品若郡主額駙官爵在一品以
上則從其爵郡主額駙以下同

王公之女自行
聘嫁其品級同得

旨知會該旗戶部並會同內務府具奏成婚事宜

郡主出嫁儀凡郡主將及笄訪外藩蒙古王子年
齒相當者奏

聞請

旨

命下以次行禮若奉

旨賜婚者額駙先詣

乾清門謝

恩如公主指婚之儀初定額駙家備燕五十席酒五十
尊若外藩王貝勒台吉等尚郡主用駝馬羊七九
牲五九遣人納于王府王受之其日會燕如納福

晉初定燕儀

右定婚

次行納幣禮額駙家備鞍馬七甲冑七若外藩王等之子用馬六十牛六十羊六百遣人齎以獻于王王納之如定婚禮

右納幣

婚前一日王使人以妝奩張陳額駙室至日額駙朝服祇候邸第王使其官屬備儀仗禮輿送郡主

于歸升輿吉時屈郡主禮服侍女引出閤詣王前
辭次詣福晉前辭均行四肅二跪二叩禮執事官
進輿于中堂侍者引郡主升輿王府護衛官前導
鐙炬前輿侍婢八人男婦五戶媵如額駙邸第額
駙出迎于門外輿至導入至內堂降輿媵導郡主
出輿額駙偕入室行合卺禮其日額駙第設婚燕
如親王納福晉之儀

右成婚

若奉

旨賜婚者成婚之明日額駙偕郡主夙興朝服詣

大內謝

恩行禮如親王納福晉儀

右謝恩

縣主出嫁儀凡縣主出嫁納幣視郡主鞍馬甲冑
各減二初燕婚燕儀準郡王若嫁于外藩王貝勒
台吉等納幣視郡主馬減十牛減十羊減百媵婢

七人男婦四戶餘同

郡君縣君鄉君出嫁儀凡郡君出嫁納幣鞍馬四
甲四胄四初燕婚燕準貝勒若嫁于外藩定婚行
七九禮初燕用牲三九納幣馬四十牛四十羊四
百婚燕用牲五九媵婢六人男婦四戶縣君納幣
鞍馬甲胄各三初燕婚燕準貝子若嫁于外藩定
婚行七九禮初燕用牲二九納幣馬三十牛三十
羊三百婚燕用牲三九媵婢五人男婦三戶鄉君

納幣鞍馬甲冑各二初燕婚燕準宗室公若嫁于
外藩定婚行七九禮納幣馬二十有五牛如之羊
二百五十初燕婚燕用牲如縣君媵鎮國公女婢
四人輔國公女婢三人男婦皆二戶凡婚儀皆與
郡主同

皇朝文獻通考卷一百三十五

欽定四庫全書

皇朝文獻通考卷一百三十六

王禮考 十二

巡幸

臣等謹按四巡之典載在虞書時邁之歌列於周
頌所以觀民設教展義示度典至重也漢唐以後
偶有巡幸之文鮮聞勤民之實我

朝

列聖相承以無逸作所為

家法

聖祖仁皇帝翠華臨幸察吏治恤民隱相度河防講求水

利若山東山西若河南陝西若江南浙江

宸遊所經父老謳思數十年如一日以至塞垣清暑畿輔

水圍歲每舉行凡以體乾健而敷兌澤

聖謨深遠誠足為萬世法我

皇上繩

武紹聞自強不息

御極五十年来舉行時巡之典詣

盛京

幸齊魯禮嵩洛歷三晉而東南吳越

車駕特六至焉所過整飭官吏加惠黎元嶽瀆懷柔神
人胥洽至於河隄海塘

躬親相度指示機宜以為一勞永逸之計前者敬遵

聖祖仁皇帝前後省方恭侍

太皇太后

皇太后鉅典祇奉

聖母親掖

安輿錫類推恩罔不周溥仰見

天家孝德之隆

聖母尊養之備遠邇欣愉殊音同聲則又稽諸往牒罕有
倫比者也謹彙次歷年

巡典具著於篇其蠲租免賦勸學造士優老恤刑諸大典

則分見於國用學校刑考茲不載若夫

盛京之地王業肇基

聖祖仁皇帝凡三巡我

皇上已四詣報本追遠愷澤覃敷則謹載於

謁

陵門至於

巡幸近畿行慶施惠諏咨民莫一歲之間

六飛屢駕其詳見於

起居注編年紀月有舉必書茲惟恭載最初一次嗣後事同一例者不備書

天聰三年三月

上南巡閱視邊境城垣頽壞者

車駕次牛莊命築新城高二丈二尺有奇加雉堞

賜督工諸臣宴次海州有漢民夫婦俱百餘歲子年七十

有三

召見令守臣善視之

九年三月

上巡幸盛京北山道經都統楞額禮墓下馬以金盃酌酒奠而痛哭之

崇德七年五月

上閱草場渡遼河

閱視牛馬羣

順治三年十月定

行幸迎送禮儀所經過地方文官知縣以上武官遊擊

以上於本境道右百步外跪迎送地方官百里內
者來朝百里外者免

八年四月定諸王文武羣臣扈從及接

駕送

駕凡

大駕行幸扈從及留京和碩親王多羅郡王多羅貝勒
各具吉服齊集朝房候

駕出宮於

午門內分兩翼序立

駕至金水橋俱跪候

駕過隨出留京固山貝子以下文武各員及隨行固山

貝子公都統各具吉服於

午門外常朝處分兩翼序立

駕出午門俱跪候

駕過其留京王以下都統以上俱隨行候

旨方回扈從護軍統領副都統參領等官各率本旗兵

丁於

駕出門外排列跪候

駕過各照旗按隊隨行

駕還宮諸王貝勒各具朝服於

午門外各樓邊分兩翼序立固山貝勒以下及文武

各官各具朝服於

午門外常朝處序立

駕至王以下皆跪候

駕過諸王貝勒隨入

午門於內金水橋前分兩翼序立

駕入宮乃退凡諸王貝勒貝子公等扈從俱分翼隨
駕行

召問則勒馬稍後欠身恭對赴

駐蹕所俱於百步外下馬扈從大臣官員候

御前鹵簿及諸王貝勒貝子公護衛過畢按旗分翼隨
行若

召問從旁入勒馬稍後欠身恭對赴

駐蹕所於二百步外下馬是月

上行幸塞外禮部奏言

聖駕出都行幸地方官例進御膳等物得

旨進獻禮物出自民間有司以此進奉於禮不合今後永
不許進

十六年十一月

上巡幸近畿過昌平州遣官分祭明諸陵

親至明崇禎帝陵前酌酒遣學士麻勒吉奠明太監王承

恩墓

諭有司明代諸陵樹木永禁樵采

康熙七年九月

諭吏部兵部朕頃以秋冬農隙講武之時欲一往邊外閱
視不久即還今覽諸臣前後各疏稱今歲災變甚多不
宜出邊以致兵民困苦朕思諸臣抒陳忠悃直言進諫
深為可嘉已允所請停止邊外之行以後國家緊要重

大事情如有未當務將所見直陳朕不憚更改

八年十月

諭戶部朕巡歷所至凡御用器物皆係所司由京城供辦毫無取於地方除內廄之馬不用飼秣卽部撥馬匹所需芻豆亦屬無多向聞地方官指稱御用私派民間預為儲侍既不銷算又不還民貪污官吏侵肥入己苦累小民重違法紀自後務加嚴禁倘有仍前借端科派者所司官嚴察叅究重懲如匿不上聞事發一併治罪

十一年正月

上奉

太皇太后幸赤城湯泉先期

諭有司動支帑金前往修理道路毋得擾民

啓蹕之日

上隨

太皇太后輦步行至神武門乘馬路出南口遣內大臣祭

明代諸陵過八達嶺

上自山麓下馬扶

太皇太后輦

太皇太后念

上步行勞苦諭乘馬

上奏曰此處道路必扶御輦於心始安至坦道始乘馬過
長安嶺亦如之

駐東山廟地少水是日山泉忽湧成河人馬皆足飲及至

湯泉每日詣

太皇太后行宮問

安以耕藉屆期回京行禮禮畢復

幸湯泉給換班兵丁口糧銀兩

回鑾日

上扶

太皇太后輦行數步方乘馬行過長安嶺大雨

上下馬步行扶

輦至嶺上

太皇太后欲少憇

上即趨行命取涼棚親視安置及下嶺仍步行如初過八

達嶺亦如初及回京至神武門下馬扶

太皇太后輦入宮隨詣

太皇太后宮問

安

臣等謹按天子之德莫先於孝

聖祖仁皇帝孝事

兩宮恭奉

太皇太后詣湯泉步行扶輦嗣後奉

仁憲皇太后南巡攬江山之名勝士庶之歡抃喜動
慈顏中外傳為盛事我

皇上敬承

家法時邁所至恭奉

聖母皇太后安輿以展養志之誠仰見我

朝

聖母嗣徽衍慶

一人推恩錫類之隆軌前後輝耀伊古以來所未有也

十六年九月

上巡視沿邊內外諸蒙古王公等來朝貢駝馬調喀喇沁
杜楞郡王扎什鎮國公烏忒巴喇一等塔布囊西
達等率兵丁一十五百名來為嚮導各賜衣帽帶
鞞白金緞布有差

二十年九月

上巡幸近畿

召霸州知州吳鑑保定縣知縣李文英詢以地方被災若何民生若何鑑等奏畢

上曰知州知縣最為親民之官必忠勤守法愛惜百姓方為稱職若肆其貪殘貽害地方國家自有定法也直隸巡撫于成龍入見

上密詢百姓生業地方事宜

賜以御衣

臣等謹按自是歲以後

聖祖巡省畿甸歲恒舉行以肄習水圍循視河隄觀風問
俗勤恤民隱於輦轂之下尤加意焉一遊一豫無
非事者頌聲之作洵與夏諺同軌矣

二十二年二月

上幸五臺山

諭巡撫穆爾賽等曰五臺繁峙靜樂崞縣等處地瘠民貧
爾等既膺簡用必持已廉潔恪共職業務期利興害除

使民生各得其所不然罪有所歸矣六月

上奉

太皇太后出古北口避暑閏六月

幸興安拜察地方

召科爾沁達爾漢親王額駙班第阿祿科爾沁多羅郡王
額駙色楞翁牛特多羅杜楞郡王畢禮袞達賴喀
喇沁多羅杜楞郡王扎什及公台吉官兵等

諭曰人生以道理為重人為情欲所牽恣意妄為以致喪

身皆由不明道理之故耳朕見其無知陷罪甚為憫惻
即今阿祿科爾沁翁牛特二旗盜賊甚衆為盜賊而致
富者能有幾人身受惡名被獲則死凡貧富皆由天命
違理妄求能必得乎爾等各遵法守分有牲畜者擇水
草善地畜牧能耕田者勤於耕種則各得生理天亦佑
之倘有貧困至極無以聊生者該管之主宜加撫恤使
之得所坐視其迫於饑寒以致離散爾等之心何安朕
本內外一視並無分別爾外國遇年歲荒歉朕即運糧

米賑濟或有困乏即賜牲畜緡疋無非慮爾失所之意
況此番巡幸爾等或有過犯朕並不執法治罪且頻加
賞賚優待爾等於此可見嗣後爾等宜遵守教諭革除
惡習以副朕好生之意及

回鑾日復

諭八旗護軍統領等穀者生民之命一歲不登則一歲之
食今正秋收之時田穀未獲向恐擅放馬匹蹂踐禾苗
屢降明諭傳飭今觀隨從人等尚有未遵法令蹂踐民

金史卷一百三十七
田者爾等各嚴緝以聞

臣等謹按此

巡幸熱河避暑之始自是每歲夏月

啓鑾至秋則舉獮狩之典仰見

聖祖健行不息詰戎綏遠之

家法超越往古矣九月

上奉

太皇太后幸五臺山

上過涿州以長城嶺山徑險峻先往親視所修道路命裕親王福全恭親王常寧隨

太皇太后駕行

諭扈從各官凡經過地方不許隨從人等借名市物擾害小民犯者并其主罪之至曲陽縣以行近五臺戒扈從人等勿射生

太皇太后駕至長城嶺

上侍左右親督校尉及隨從人等前後扶行歷嶺路數盤

山勢巉崿險隘殊甚

太皇太后諭曰嶺路實險予及此而止積誠已盡五臺諸寺應行虔禮者皇帝代我行之猶我親詣也

上下馬受

命躬送

鑾輿還龍泉關仍命裕親王福全扈行

上瞻禮五臺諸寺發白金三百兩綿三百觔命有司分給

所過地方貧民

二十三年九月

上東巡先是吏科給事中王承祖疏請巡狩燔柴泰山即過孔林觀禮器下九卿議應如所奏從之遂

諭戶部曰朕軫念蒼生勤求治理邇年以來於畿輔郡縣時行歷覽補助兼施今俯允廷議諏吉東巡正欲體察民情周知吏治一切沿途供用皆令在京有司儲備毫不取之民間猶恐地方官役不能深體朕懷借端支應妄行濫取今特加申飭如有悖旨私徵一經發覺定行

從重治罪更念此番巡歷原以撫卹編氓問俗觀風於閭閻休戚務期洞曉凡經過地方百姓須各安生業照常寧處毋得遷移遠避反滋擾累爾部即行令該地方徧令曉諭知之前期

頒詔天下曰帝王誕膺景命統御萬邦道重觀民政先求莫是以虞廷肆覲肇舉省方周室懷柔式歌時邁詩書具在典制丕昭朕仰荷

天庥纘承

祖烈撫茲兆庶期底時雍夙夜孜孜懋求治理以富以教
靡敢怠遑猶慮部屋艱難罔由上達故於直隸郡縣周
覽巡行勤施補助更念山左等處土宜俗尚不加循習
曷克周知矧歲逢甲子世際昇平聿圖泰運之恒新在
措芸生於豫大乘時命駕咨彼民依但樂利祇慰夫一
方而德澤未敷於九有朕心歎焉用是特昭公普以宏
仁庶奏誠和之盛治於戲時臻熙皞彌隆寬卹之恩戶
樂清寧丕篤綿長之慶布告天下咸使聞知

車駕發京師日鹵簿大駕照常陳設王以下文武各官跪
送如常儀經過百里以內地方官率本地鄉紳士
民迎於十里之外本地鎮守滿漢官軍各整隊伍
亦於十里外恭迎至山東泰安州

親詣

嶽廟祀

泰山之神遂登泰山絕頂侍臣請往觀捨身崖

上曰愚民無知惑於妄誕之說以捨身為孝不知身體髮

膚受之父母不敢毀傷故曾子有臨深履薄之懼且父母愛子惟疾之憂子既捨身不能奉養父母是不孝也此等事宜曉諭嚴禁使百姓不為習俗所誤觀之何為

至桃源縣

閱黃河北岸諸險工指授河臣方畧

上目擊隄夫作苦駐轡久之親加獎勞復

諭河臣曰隄上工役勞苦倍常所給工食為數無幾恐不肖官役從中侵蝕當使人人得沾實惠渡黃河遣官祭河

神

上臨視天妃閘水勢湍急令河臣改為草壩另設七里太平二閘以分水勢

御舟過高郵湖見民間田廬多在水中惻然念之因登岸循行隄畔十餘里

召耆老詳問被災之由復

諭督臣曰朕此行原欲訪問民間疾苦凡地方利弊必設法興除使之各得其所昔堯憂一夫之不獲況目睹此

方被水情形豈可不為拯濟耶渡江乘沙船風浪恬靜
舟行甚速

上顧侍臣曰自兵興以來恢復岳州長沙多得此船之力
今海寓承平昔時戰艦僅供巡幸渡江之用然安當思
危治當思亂朕乘此舟未嘗不念艱難用武之時非以
觀遊為樂也至蘇州府

上謂侍臣曰向聞吳閭繁盛今觀其土風大略尚虛華安
佚樂逐末者衆力田者寡遂至家鮮蓋藏人情澆薄為

政者當使之去奢返朴事事務本庶幾家給人足可挽
頽風漸摩既久自有熙皞氣象至江寧府遣官祭

明太祖陵

御製祝文

上仍親詣

明太祖陵奠酒是日過明故宮慨然久之

幸江寧教場令將軍副都統總兵等官校射

上親射右發五矢五中左發五矢四中士民觀者咸歡呼

動地

上將回鑾地方文武各員及縉紳士民數十萬跪送

諭之曰朕向聞江南財賦之地今觀市鎮通衢似覺充盈
其鄉村之饒人情之朴不及北方皆因粉飾奢華所致
爾等大小有司當潔已愛民奉公守法激濁揚清體恤
民隱副朕老安少懷之至意至江都縣

命吏部尚書伊桑阿等往視海口議疏導之法至淮安府
閱高家堰及黃河南岸諸險工至宿遷縣

閱隄工居民老幼數千人跪迎隄畔其年老貧寒者各賜

白金

駕至曲阜縣親詣

先師廟致祭特行三跪九叩禮遣官祭啓聖公皆

御製祝文禮成

上御詩禮堂選孔氏子弟二人進講經書周覽

先聖遺蹟復詣

孔林酌酒

御前曲柄黃蓋留設

先師廟廷遣恭親王常寧及禮部尚書介山祭

元聖周公廟

御製祝文

二十八年正月

上南巡先期

諭吏部戶部兵部工部朕統蒞寰宇二十八年於茲旱作
夜思勤求治理務恤黎庶永圖乂安如黃運兩河運道

民生攸係朕日切心勞比年工役雖漸有緒而應修應
塞議論紛紜曩歲巡幸曾允淮揚士民所請疏濬下河
前已興工尚稽底績屢經廷議請朕親行閱視今特諏
吉南巡躬歷河道兼欲觀覽民情周知吏治所至沿途
供億皆令在京所司儲備一切不取之民間即有日用
應需該衙門於所在地方照市估平買不許錙銖抑勒
小民猶恐地方官吏不能悉體朕懷借名科派供應今
特頒諭嚴飭如有悖旨借端私徵者察實即以軍法從

事地方文武大小官員不許與扈從官員指稱交戚輒
通餽遺違者並以軍法從事其扈從大小官員及隨往
僮役如有生事擾民者一并從重治罪朕茲巡省原以
軫恤編氓咨諏風俗凡經過地方百姓各安生業務令
廛無廢市隴不輟耕毋得倉皇驚避輒滋煩擾其軍民
人等懷奸挾詐希逞私憤擅於駐蹕處所瀆行告訴者
一概嚴禁倘有妄控除所告事不與准理外仍嚴加治
罪爾部即傳諭各該督撫備行曉諭以副朕惠愛元元

至意

駕過獻縣民有進嘉禾一莖雙穗者

諭侍臣曰自古聖王不貴金玉而貴五穀穀者民之命也
朕甚寶之至山東

躬率文武諸臣望祭

岱宗行禮至江南界

閱視中河親坐隄上出河圖指示諸臣至揚州府

諭江浙督撫諸臣曰朕省察黎庶疾苦兼閱河工巡幸江

南便道至浙觀方問俗簡約儀衛鹵簿不設扈從者僅
三百餘人頃經維揚民間結綵歡迎盈衢溢巷雖出恭敬
愛戴之忱恐至稍損物力甚為惜之朕視宇內編氓皆
吾赤子惟使比戶豐饒即不張結綵幔朕心亦所嘉悅
前途經歷諸郡邑宜體朕意悉為停止又見百姓老幼
男婦奔走雜還瞻望恐後未免諠譁擁塞念此行原以
為民不嚴警蹕但人衆無所區別高崖水次或有傾跌
之虞一夫不獲其所足軫朕懷此後止於夾道跪迎勿

得紊亂追趨致有諸患自蘇州抵杭州府

諭扈從部院諸大臣曰朕稽古省方咨求治理閱視河道
期底平成凡有利於民生必令羣沾實惠念政治所先
在崇文教江南浙江為人文萃集之地入學額數應酌
量加增永昭宏獎江寧鎮江杭州駐防滿洲漢軍兵丁
鎮守要地久歷歲時深用軫念應加恩賚以彰優恤自
南巡以來所經過地方官員除八法處分及列款糾劾
外凡因公罣悞降級留任者俱准與開復降級調用者

著帶所降之級留任其經過地方現在監禁人犯除十惡及詔款所不赦等罪並官員犯賊者不宥外其餘自康熙二十八年二月十一日以前死罪及軍流徒罪以下已結未結俱准寬釋以示朕赦罪宥過之意備辦船隻地方各官効力勤勞著該督撫會同奉差官員確查具題各加一級繹夫供役勞苦亦著該督撫察明人數量給恩賞朕屢念民依特蠲租賦總期實德潤澤蒼生近見民間有建立碑亭稱頌德意者雖出羣黎感戴之

誠但恐各郡皆然未免致損民力誠使閭閻殷阜則裨益良多碑亭何與焉嗣後亦宜停止江浙錢糧既經蠲豁猶慮有不肖有司借端詞頌朘削民生著諸督撫嚴行禁飭至各處權關原有則例朕舟行所至諮訪過關商民每不難於輸納額稅而以稽留關次不能速過為苦權關官吏理宜遵奉屢頒諭旨恤商惠民豈可反貽之累自今應力除積弊凡商民抵關交納正稅即與放行毋得稽留苛勒以致苦累朕蚤夜孜孜惟冀官吏軍

民士農工商無一人不獲其所故於民生吏治圖維區
畫務極周詳爾等可即傳諭俾一體奉行稱朕意焉
賜扈從王大臣侍衛及部院諸臣銀幣渡錢塘江至會稽
親詣

禹陵致祭

御撰祭文祭文內書

御名禮成還錢塘

閱視官兵騎射以杭州將軍郭丕等請留駐一日

諭諸臣曰朕茲行特為閱視河道諮訪閭閻風俗因禹陵在邇躬往致祭歸時便道過西湖聊爾寓目非為遊觀也又

諭扈從部院諸大臣曰朕巡省民生風俗行次浙江見省會兵民俱相和輯生齒蕃庶閭里乂安但觀民間習尚好為爭訟爭訟一興則不肖有司因緣詐索勢所必至縱或官員無所朘削而胥吏作奸究不能無私行勒索之弊則小民之牽連苦累者多矣夫微忿不捐構成嫌怨

小則耗損物力大則傾隕身家其為蠹害不可勝言矜
此愚民允宜深戒地方大小衙門官員亦應各簡詞訟
勸導閭閻俾守分息爭共安生業又夙聞東南巨商大
賈號稱輻輳今朕巡歷吳越州郡察其市肆貿遷多係
晉省之人而土著者益寡良由晉風多儉積累易饒南
人習俗奢靡家無儲蓄目前經營僅供朝夕一遇水旱
不登則民生將至坐困苟不變易陋俗何以致家給人
足之風爾等可傳諭將軍總督等令家喻戶曉務使敦

本興讓崇儉黜浮兵民日益協口風俗日益淳樸詞訟
日益減少積儲日益豐盈則教洽化行朕心實加賴焉
至蘇州府蘇松紳士軍民等獻本處所產土物叩

請

聖駕暫留數日

上曰國家之用雖盡出於百姓朕茲南行民間之物秋毫
無犯爾等既各輸誠姑取米一撮果一枚以慰民殷勤
來貢之意至朕時巡事畢明日發駕不必勉強留臣民復

再三叩請

上命再駐一日至江寧府

親詣

明太祖陵饗殿致祭復至陵前奠酒賜守陵人白金

百兩

閱江寧駐防官兵步射賞江寧鎮江杭州駐防兵丁一月
錢糧至淮安復

閱高家堰隄岸指授方畧

三十年四月

上巡幸多倫諾爾喀爾喀汗台吉等來朝謁受封賞有差
是歲以喀爾喀土諾圖汗等率所屬數十萬人來
歸

特往撫綏安輯

諭內大臣等嚴約官兵人衆勿使踐踏麥田至古北口

閱總兵官蔡元標下官兵至多倫諾爾

上御行宮前黃幄喀爾喀汗台吉等行三跪九叩禮以次

序坐樂作大宴

上親閱喀爾喀營寨察其窮困者賞以銀布又大賚喀爾喀王貝勒貝子公台吉等牛羊留兵部尚書馬齊料理會閱事

上回鑾喀爾喀土謝圖汗車臣汗王貝勒貝子公台吉等皆依戀不已伏地流涕

諭扈從諸臣曰昔秦興土石之工修築長城我朝施恩於喀爾喀使之防備朔方較長城更為完固矣

三十五年二月

上親征噶爾丹出獨石口駐中拖陵地方撫遠大將軍費
揚古以捷書聞

御慢城行慶賀禮

回鑾至清河設鹵簿

皇太子諸

皇子諸王及在京文武大小官員出郭外五里跪迎
八旗護軍驍騎步軍及近京閑散官員士民工商

耆老男婦夾道捧香跪迎九月

上巡幸北塞經理軍務出張家口歷歸化城渡黃河至東
斯垓地方乃班師

三十六年二月

上巡幸寧夏出師征噶爾丹

諭大學士曰自古帝王巡狩凡所過地方前代帝王陵寢
先賢墳墓及名山大川皆行致祭甚盛典也朕今巡幸
沿途所經其有古帝王陵寢先賢墳墓名山大川皆詳

察具奏應致祭者祭之

上至寧夏諭川陝督臣曰朕巡幸沿邊地方詢察閭井生聚及土田沃瘠之狀自晉及秦經行三千餘里直抵寧夏所以勤求民隱至殷且切朔方資大河之灌注疏渠溉田宜於稼穡當茲春氣暢遂正三農盡力南畝之時誠恐有司官員不體朕懷因車駕經臨調遣師旅借辭供億擾累小民東作有妨西成奚望今一切軍需芻糧俱儲侍足用至扈從簡約馬悉放牧並不以供辦草豆

動煩民力爾可傳飭有司勿借端科派違者治罪務使
地方百姓各安本業屢無廢市隴不輟耕以副朕親歷
邊圉軫恤民隱之至意

御製牌文曰諭寧夏文武官員兵民人等朕體天育物日
以治安為念雖身在宮庭而心恒周四海頃因指畫軍
務不憚勤勞遠蒞寧夏無非為蕩滌寇氛綏乂生靈計
也緣邊千餘里土壤磽瘠惟寧夏洪流灌輸諸渠環匝
巡覽所至甚愜朕懷夫農桑者衣食之本積貯者殷阜

之原爾官吏宜董勸父老子弟三時力田以盡地利比
屋勤殖以裕蓋藏縱使歲偶不登亦可無憂匱乏若夫
秦風健勇自昔為然其在朔方尤勝他郡爾等或職居
將領或身隸戎行尚各厲精銳以効干城禦侮之用斯
國家有厚賴焉至於忠信慈惠服官之長軌孝弟齒讓
生人之大經法紀不可不明禮教不可不肅勿以地處
邊陲而不治以經術勿以習尚氣力而不澤以詩書總
期上率下從庶幾馴臻雅化茲乘輿返蹕距靈朔雖遠

而瞻念塞垣如在几席爾等誠能敬體朕言將吏協恭
兵民咸理生聚日益厚風俗日益淳則疆圉實有攸裨
朕心亦用深慰慎勿視為具文辜朝廷惓惓牘導之意
欽哉遂自寧夏出師往白塔駐狼居胥山

駕出行宮親閱八旗鎗手綠旗兵起行至布古圖地方撫
遠大將軍費揚古奏報噶爾丹窮蹙飲藥自盡

上率文武官員拜

天畢

御行宮行慶賀禮乃班師

三十七年四月

上幸五臺山路經房山

命皇子及大學士至

金太祖

金世宗陵奠酒

三十八年二月

上奉

皇太后南巡前期

諭吏部戶部兵部工部朕撫馭寰區孜孜圖治期於天下
咸遂生成物無不得其所今邊烽永靖四方無事獨是
黃淮為患衝決時聞下河地方田廬漂沒朕軫念民艱
曩曾屢遣大臣督修不惜數百萬帑金務期早綏黎庶
乃歷年已久迄無成功今水勢仍復橫濫漫漫城閭沉
沒隴畝以致民多失業董其役者未有上策可以宜民
時屢朕懷未嘗少釋在內諸臣咸請朕親臨指示為一

勞永逸之圖方今春時水勢減少正宜講求疏濬以遂
安瀾爰諏吉南巡親加勘閱更以吳地襟帶江湖乃東
南輿壤勵俗省耕兼行臨視凡一切往返供億已皆俾
辦於京師即途次日用所需亦令各衙門照本地時值
採買總於民間一無所累仍恐沿途官吏藉名科派致
累閭閻故特頒諭嚴行申飭如有悖旨假託派索者察
實即以軍法從事其扈從大小官員隨行儻從人等如
有橫行生事者一并從重治罪凡經過地方百姓各安

生業皆如常時毋得違遽引避其軍民人等懷挾私怨
受人指使擅於駐蹕處所輒行告訐者一概嚴禁不准
仍照例嚴加治罪爾部即傳諭通知以副朕體恤惠愛
至意

駕發京師由水路啟行將抵江南界

御舟先行閱視高家堰歸仁隄等工畢回至奉迎

皇太后舟渡河復

臨視黃河隄岸

命截留漕糧二十萬石於被水地方減直發糶渡江自京

口至杭州府傳

諭接駕兵丁速行遣回勿使踐踏麥田又

諭各鹽差關差向因軍需煩費於正額外令在差官員以
所私得贏餘交納充用今思各官孰肯自捐私橐必仍
行苛取商賸民困職此之由著將加增銀兩一概停罷
至江寧府遣官祭

明太祖陵

躬詣奠酒

諭大學士等令訪求明代後裔授以一官俾世守祀事

回鑾渡黃河

閱視新埽並

閱河標官兵射仍由水路還京

四十年正月

上巡幸塞外

諭大學士等朕聞索岳爾濟山係名勝之山最為高大今

巡幸塞外欲乘便一往視之遂出張家口過上都塔爾
呼必拉歷烏闌布通至喀爾必拉

幸索岳爾濟山

諭大學士等曰此山形勢崇隆允稱名勝嗣後此山禁止
行圍

四十一年正月

上幸五臺山山西百姓詣

行宮前跪奏言晉省饑饉蒙

恩蠲免錢糧又動支倉粟賑濟愚民無以仰報請於菩薩

頂建立

萬壽亭

上不允諸百姓跪獻各種食品命各取菓品少許

上回鑾至大城縣

巡視子牙河諸隄九月

上南巡閱河至德州

回鑾前期

諭吏部戶部兵部工部朕念黃淮兩河為運道民生所係
屢次南巡親臨閱視以疏濬修築之法指授河臣開六
壩以來淮敵黃通海口以引黃歸海比歲以來工程次
第告竣修防漸有成效昨年冬月河臣張鵬翮曾以河
工善後之策及應修之處請朕親閱指示茲當農事之
隙減約從員輕裝南下自徐州一路循視堤堰沿途皆
設營幄不御屋廬日用所需悉已儲備經過地方一切
供帳宜通行禁止倘有官吏藉名科派累及小民或指

稱預辦擅動庫帑察出定嚴加治罪地方大小文武官員託言親舊私相餽遺及隨從人等有妄行生事者俱以軍法從事閭閻百姓各事本業不須引避有懷挾私怨於駐蹕處所告訐者一概不准仍照律治罪該部即傳諭通知

駕發京師至德州留駐十數日

諭扈從諸臣曰朕因閱河南巡今以皇太子允礽患病朕駐蹕此地為時已久應即回鑾明歲再閱視河工也

金史卷一百三十六
四十二年正月

上南巡自

暢春園啓行至泰安州登岱遣領侍衛內大臣詣
嶽廟致祭入江南境沿途

周視河防至蘇州府賞賚扈從大臣及侍衛護軍執事人
等白金有差至杭州府遣官閱錢塘江隄至鎮江
府賜京口驛站兵丁銀兩駐江寧府遣大學士馬
齊祭

明太祖陵又

命皇太子往奠酒

回鑾以河工告成

頒詔天下十月

上西巡前期

諭吏部戶部兵部朕統御寰區勤求治理鑾輿時邁省方
觀民春月閱視河工自畿輔山東以及江浙地方皆經
巡幸茲兩河漸已底績所至之地民生風俗亦因以周

知念陝西省為巖疆重地當出師塞外時曾經歷其邊境而西安一路未及親莅頃陝西督撫諸臣言秦民望幸之心至殷至切合詞陳奏河南山西巡撫等亦諄切具請乘此冬令農隙之際觀覽民風詢察吏治簡閱禁旅整飭軍營實為要務用是輕裝約從諏吉西巡沿途一切供御皆內廷儲備纖毫不取辦於地方即偶有市易之物亦敕所司依時價給值不許錙銖抑勒所過大小官員宜體朕愛民德意勿借詞供億私派閭閻如有

悖旨科斂者察出即以軍法從事地方官不許與扈從人員指稱交戚私相餽遺違者並以軍法從事其扈從人員宜約束僕役勿使妄行如不遵法紀生事擾民一并從重治罪朕視民如子凡乘輿所至市廛隴畝宜各安生理米豆薪芻等物民間照常貿易不必禁止惟懷私挾詐衝突告訐者所告事不准理仍嚴加治罪爾等即傳諭扈從官員人等並行各督撫令於經過府州縣城市村莊徧示曉諭俾咸悉朕懷

駕發京師

命給事中御史各一人於扈從後察不法者即時鎖拏至

太原府

閱官兵騎射復

諭山西撫臣曰朕君臨天下四十餘載無一刻不以蒼生為念近因西省望幸甚切故于冬時農隙減從輕騎由晉及秦入境以來觀風問俗見民生畧有起色閭閻之間俗朴尚儉朕心少慰朕自弱齡讀書往往以不知窮

簷僻壤之疾苦為嘆息所以留心於官方凡有往來者
必先諮詢民情豐歉偶有失時定加蠲賑且思晉省不
通水運歲或不登即難籌畫雖有州縣存貯之米穀未
必實數具在反益不肖有司之虧空也今歲山西收成
頗佳爾等仰體朕愛民如子之至意曉諭民間若歲豐
用奢則荒年必致匱乏教之以禮義導之以守法重農
務本藏富於民則朕無西顧之憂矣凡朕所歷之處必
大沛恩澤其將四十二年以前山西所屬州縣未完銀

兩米草盡行蠲免以示朕加惠黎元之念至洪洞縣遣

官祭

女媧氏陵

駕渡河至潼關遣禮部侍郎祭

西嶽華山賜固原提標迎

駕兵丁二百五十名銀兩又賜接

駕百歲壽民銀兩至西安府

閱駐防官兵分別賞賚遣官分祭

周漢唐帝王陵寢

諭禮臣曰文王武王皆古之聖君非他帝王可比祭文內

可書朕名

諭督撫諸臣曰秦省為天下要地時厯朕懷曩者連歲荒旱所司未經奏報朕訪聞得實即多方籌畫運米拯濟蠲賦免逋秦民始得少蘇自康熙三十二年遣皇太子允禔致祭華山以來雨暘時若年穀豐登閭閻稍有起色朕隆冬跋涉風霜遠臨茲土見百姓歡迎載道且知

今歲有秋地方文武大吏更能恪勤奉職滿漢軍士亦
皆訓練有方朕心甚悅凡巡幸所至必大沛恩膏今將
陝西甘肅所屬康熙四十二年以前各項積欠銀米草
豆錢糧盡行蠲免俟四十三年直省咸獲豐稔當將秦
省四十四年正供亦行免徵該督撫即通行曉諭俾窮
鄉僻壤小民均沾實惠至陝州

命皇子及侍衛等往閱三門底柱

駕由孟津渡河遣官祭

漢光武帝陵

諭河南撫臣曰朕念西土兵民生計乘冬令農隙之時特
事西巡返轡京師道由豫省自入潼關見閭鄉以及河
南府民生甚艱而懷慶少裕至衛輝府則又艱苦賴薄
有秋成尚能餬口倘遇歉歲必至流亡此皆大小官吏
互相容隱雖有衰老病廢懶惰退諉之員仍使在任以
致貽誤地方河南百姓質朴愚魯輸賦從未稽遲而今
歲所欠乃至四十萬兩顯係州縣官聞朕蠲除秦晉積

欠錢糧希冀恩免於中漁利見今民欠俱免催徵著將
河南通省俸工銀兩補足所欠之數如有不完停其陞
轉俟完日開復至磁州

賜先賢端木子後裔為五經博士

御書賢哲遺休匾額命懸先賢端木子墓前

四十四年二月

上南巡前期

諭吏部戶部兵部工部朕厯念民生加意河道屢行親閱

一切疏濬修築事宜悉經周詳指畫獲告成功前黃河之水往往倒灌清口者皆由仲莊閘與清口相對駱馬湖水勢湍急遂逼黃流灌入清口朕視河時躬臨相度命河臣移仲莊閘改建於楊家莊出口工竣之後河臣報稱黃水暢流入海絕無倒灌清口之患朕尚未經親閱今欲特蒞其地察驗形勢用籌善後之規其中河黃河運河有應加修防者亦隨宜指示以圖經久至於山東省薦饑之民賴兩年來極力賑贍繼以有秋幸皆得

所其民間生聚果否殷阜並於沿途親行周覽焉乘茲仲春解凍減從輕裝循河南下往返皆用舟楫不御室廬經過地方不得更指稱繕治行宮妄事科歛其日所需俱自內廷供御從無纖毫取辦於民前此屢次南巡閭閻皆所深悉倘有不肖官吏藉名預備擅動官帑並圖日後加派補償以為巧取侵漁之地者事覺嚴行治罪決不寬宥所在官吏私餽扈從人員及隨行人役生事擾民者俱如前旨以軍法從事奸民挾私控訐者

從重治罪爾部即通行傳諭

駕發京師於張家灣登舟至山東境紳士軍民數十萬跪
迎奏言山東連年饑歉蒙

恩截漕散賑蠲免錢糧通省民命始得全活無不感激垂
涕

諭山東巡撫曰朕為兩河告成特來巡閱道經山左見民
生自去歲休養之後漸有起色朕心甚慰夾岸黃童白
叟歡呼載道感恩叩謝者日有數十萬今仲春之時麥

苗未長未致妨農倘回鑒之際正值農忙麥秀恐妨稼
穡爾即曉諭百姓概免叩謝各務農事可也

駕入江南境士民夾道跪迎奏稱

聖駕屢臨河上指示修築淮黃方畧故能不告成功今復
謀及萬全務期善後不憚跋涉之勞為民閱視河
道亘古未有感

恩叩謝歡聲雷動至蘇州府恭遇

聖誕百姓爭獻食物得

旨朕因閱視河工巡訪風俗而來非為誕辰也朕一切應用之物俱備自內府所過地方秋毫無犯今爾兆民中心篤至朕已知之即如朕受之爾等可攜去至松江府閱各標官兵射

賜松江兵丁餉銀一月至青浦縣

御書聖跡遺徽扁額命懸掛孔宅相傳漢時孔氏苗裔避地至此奉

先聖衣冠葬處也

諭江南督撫曰朕為兩河告成楊家莊新河建閘特來閱
視爾等同地方士民再四懇請故渡江而南見百姓雖
不能比戶豐饒幸安居樂業無憔悴之色朕心少慰矣
編氓皆朕赤子休息撫養已數十年民雖至愚亦所深
悉所以扶老攜幼日計數萬隨舟擁道歡聲洋溢者皆
由中而發非假飾也但人多路隘菜蔬苗麥瀰漫田野
不能保其無損朕甚惜也爾等即出示曉諭萬勿踏壞
田禾有負朕恤民之意至杭州府

閱浙江各標官兵射

賜杭州八旗兵丁餉銀兩月至江寧府遣官祭

明太祖陵

上仍親往率諸皇子及大臣侍衛等行禮自蘇州至江寧
御試士子者三中選者給白金令赴京錄用有差

駕至清河復

臨高家堰徧閱河隄仍由水路回京

四十六年正月

上南巡前期

諭吏部戶部兵部工部朕念淮黃兩河工程為東南要務屢次躬臨河上相度指示一切修防疏濬業已次第奏功昨歲河漕督撫諸臣詳勘地形請於溜淮套別開河道直達張福口以分淮勢朕欲即令動帑興築而督撫諸臣又以事關創建合詞請朕親閱九卿等集議復再三陳請朕以諸臣之言奏聞

皇太后祇遵

慈命擇于本年正月二十二日啓行閱河舟楫往返不御
室廬日用所需取辦內府經過府州縣毋得更以預備
行宮供設御用冒侵庫帑科斂閭閻倘有不遵事覺定
嚴加治罪其文武大小官員私相餽贈隨從人役生事
擾民及奸惡挾私告訐者俱如屢次諭旨重處不宥爾
等即轉行各該督撫通飭所屬張示徧諭俾咸知悉
御舟至臺莊士民數十萬人進獻食物恭請暫停

御舟少伸瞻仰之忱

上為之登岸

御龍亭令耆老近前問以農事生計

諭令停止進獻耆老復叩懇收納

命收食物一二種

上由清口閱視溜淮套詳看形勢

命停止開河渡江至江寧府遣大學士馬齊祭

明太祖陵復

親往行禮

幸演武場閱射

賜扈從大臣侍衛護軍及執事人等金幣有差至蘇州恭

遇

聖誕士民萬餘人集

行宮前進表叩祝

萬壽至松江府

閱提標官兵射至杭江府

閱浙江駐防官兵射

賜扈從大臣侍衛護軍及執事人等緞匹有差

諭江浙督撫曰朕因視河駐蹕淮上江浙兩省官員及地方官紳士軍民皆環道遠迎懇請臨幸朕勉順羣情涉江而南巡省風俗所至郡縣見雨暘應時麥苗蕃殖比閭樂業可冀盈寧雖山東一路尚未悉觀而江浙田疇鬱葱在望深愜朕懷方今二麥垂熟正將刈穫之時一切扈從人員皆以次舟行不致蹂躪誠恐百姓沿途迎送老稚扶攜動盈千萬越阡度陌不無踐傷朕心甚為

軫惜凡所過地方悉令停止迎送且節候漸熱朕舟行
乘夜迎涼亦未可定民雖遠來無由親見爾等督撫可
張示徧加曉諭無負朕重農愛民之意

四十九年二月

上幸五臺山

五十七年七月編纂

省方盛典左都御史蔡升元疏言

皇上親閱河隄指示方畧淮黃底定漕運無虞生民永賴

至于

翠華時巡察吏治訪民俗諮問必周芻蕘必納

聖德神功洵可為萬世法恭請編纂

省方盛典一書以光至治禮部議覆應如所奏設局纂修
從之

皇朝文獻通考卷一百三十六

欽定四庫全書

皇朝文獻通考卷一百三十七

王禮考 十三

巡幸

乾隆六年七月

上奉

皇太后巡幸避暑山莊

諭曰朕初次行圍所有經過州縣前經屢降諭旨不令

絲毫擾累但安營除道未免有資民力朕心軫念著將該地方本年應徵額賦蠲免十分之三以昭朕體

恤問閭至意

嗣後巡幸所過地方皆準此例

臣等謹案

山莊之建始於康熙四十二年每歲

車駕避暑於此至秋則舉大獮之典而藩部以時覲謁焉

皇上繼述

志事於詰戎綏遠之猷遵循罔替自是年始

巡行塞外校獵木蘭一如

聖祖故事茲謹誌熱河

行幸之初而圍獵之制則別見於

大狩門

十年七月

上奉

皇太后巡幸多倫諾爾

諭曰朕向來巡幸所過地方曾派員嚴查隨從官兵人

等不許蹂躪農田滋擾百姓此次啓行之時正值秋成在望禾稼尚未登場誠恐約束不嚴以致踐踏禾黍有妨農務著都統阿蘭泰護軍統領法諸那管理多派官兵沿途察看嚴加鈐轄其隨從官員兵丁亦令將家人跟役自行管束如有不遵禁令傷及田禾者即行查叅并行令該督提等遴委員弁一體稽查毋得玩忽

十一年九月

上奉

皇太后巡幸五臺山

諭曰朕臨幸五臺觀風問俗蓋欲周知閭閻利病舉登之衽席之安也山西地方風俗向為淳朴朕此次巡行親見民情頗屬寧輯但敦龐之質在民而教養之責在上尤當加意拊循化導俾登上理撫臣乃通省之表率藩臬乃師帥之大員府州縣等皆有父母斯民之責其各仰體朕心力行實政教養兼施惟日孜

攷罔或怠佚而在小民亦應敦行孝弟崇習禮讓共
為良民毋蹈澆漓獷悍之風以成熙皞益寧之治朕
有厚望焉

回鑾閱滹沱河堤工改慶都縣曰望都

諭曰朕自真定回鑾固城祁水之間有縣焉與堯母同
名雖述古之意也觸目踟躇於意弗安其易之仍為
望都

十三年二月

上奉

皇太后東巡先是十二年六月

諭大學士等朕幼誦簡編心儀

先聖一言一動無不奉

聖訓為法程御極以來覺世牖民式型至道願學之
切如見羹墻辟雍鐘鼓躬親殷薦而未登闕里之堂
觀車服禮器心甚歉焉仰惟

皇祖聖祖仁皇帝巡幸東魯親奠

孔林盛典傳於奕禩

皇考世宗憲皇帝崇聖加封重興廟貌嘗遣朕弟和親王
恭代展祀未以命朕意者其或有待歟朕寅紹丕基
撫茲熙洽思以來春孟月東巡狩因溯洙泗陟杏壇
瞻仰宮牆申景行之風志復奉

聖母皇太后懿旨泰山靈岳坤德資生近在魯邦宜崇報
饗朕不敢違爰遵

慈訓親奉

鑒與秩於岱宗用答鴻貺旋蹕青齊觀風布澤以昭崇

聖法

祖教孝省方鉅典所有應行典禮大學士會同該部稽考
舊章詳悉具議以聞至行在一切所需悉出公帑無
得指稱供頓儲侍絲毫貽累閭閻羽林衛士內府人
役等各該管大臣嚴行稽查約束並令扈蹕文武臣
僚嚴飭儉從無或侵踐田疇致妨宿麥如有騷擾地
方指名需索者立即叅奏從重治罪通行曉諭知之

至是年二月

駕發京師至曲阜縣

躬詣

文廟至大成門下輦步入行三跪九叩禮

駕至詩禮堂升座令孔氏後裔講周易中庸一章以御前曲柄黃蓋留設

先聖廟庭遣親王致祭崇聖祠大臣分獻四配十哲禮畢

上詣

少皞金天氏陵

元聖周公廟致祭復謁

孔林奠酒

賜衍聖公及孔氏子孫十二氏子孫官員恩賚有差至

泰安

上恭詣

岱嶽致祭至濟南府

閱兵

上校射連發皆中復

觀詣

舜廟行禮

上回鑾

十五年二月

上奉

皇太后巡幸五臺山先是十四年十二月

諭曰朕前經降旨於來年秋間巡幸五臺由晉入豫省
覽中州迴蹕畿輔近日嚮導人員回奏稱自太原一
路至河南境由太行山麓甚為崎嶇狹隘朕省方巡
幸惟取便民若因修治道途重煩民力非朕觀風問
俗本意應於春間即詣五臺至秋間百穀登場後再
幸中州至是

駕發京師

諭扈從大臣等曰時屆春融正秋麥紐芽之後幸自去

冬至今瑞雪頻沾土膏滋潤漸已青蔥入望所有經過地方車馬僕從俱著嚴加誡飭毋得踐踏八月
上奉

皇太后巡幸中州

諭大學士等朕時巡中嶽所有直隸河南二省預備道路營盤等項俱係案款銷算惟是經過地方不無隨時修葺恐致少有拮据著於直隸二省公項錢糧內各賞銀一萬兩交與督撫通融辦理以示體恤

駕至河南府

親詣

中嶽致祭遣官致祭

河瀆

衛水

周漢帝王陵寢至開封府

閱兵

諭曰朕舉行秋狩觀岳省方蓋欲周覽民情懋登治理

凡地方之利弊官吏之賢否與夫政令之得失清蹕所至日切疇咨河南地宅土中素稱淳朴今值雨暘協應禾應告登巡行之次親見閭閻望幸童叟歡欣而俗尚敦龐室廬寧輯朕懷深為欣慰顧惟因時保治之方其權實操之自上撫臣表率通省藩臬任寄旬宣以至郡守牧令與民愈親則導民尤切應仰體朕心力行善政敦本訓俗除惡安良教養兼施屏虛文以求實政其在小民亦當敦禮讓務農桑從儉去

奢力田孝弟以期共亨昇平之福朕於該省臣民有厚望焉

上回鑒

十六年正月

上奉

皇太后南巡先是十四年十月

諭大學士等江南督撫以該省紳耆士庶望幸心殷合詞奏請南巡朕以鉅典攸關特命廷臣集議今經大

學士九卿等援据經史且仰稽

聖祖仁皇帝六巡江浙謨烈光昭允宜俯從所請朕軫切
民依省方問俗郊圻近省不憚躬勤鑒輅江左地廣
人稠素所厯念其官方戎政河務海防興凡閭閻疾
苦無非事者第程途稍遠十餘年來未遑舉行屢嘗
敬讀

聖祖實錄備載前後南巡恭侍

皇太后鑾輿羣黎扶老攜幼夾道歡迎交頌

天家孝德心甚慕焉朕巡幸所至悉奉

聖母皇太后游賞江南名勝甲天下誠親掖

安輿眺覽山川之佳秀民物之豐美良足以娛暢

慈懷既詢謀僉同應允從所請但朕將以明年秋幸五臺

經太原歷嵩洛趙魏回鑾已涉冬令南巡之舉當在

辛未年春正我

聖母六旬萬壽之年也將見巷舞衢歌歡騰獻祝稱朕以
天下養之至愛上以廣承

歡之慶下以慰望幸之忱益深嘉悅屆期諏吉以聞嚮導
人員朕酌量先期簡派前往清蹕所至簡約儀衛一
切出自內府無煩有司供億至行營宿頓不過偶一
經臨即暫停亦不踰旬日前歲山左過求華麗多耗
物力朕甚弗取曾經降旨申飭明歲晉豫等省以及
江南俱不可倣效至名山古蹟南省尤多亦祇掃除
潔淨足備臨觀而已毋事崇飾倘有頽圯隨宜補葺
悉令動用官項但當據實不得任有司浮冒其民間

張燈結綵

聖祖嘗以為戒載在方冊宜共恪遵其慎勿以華侈相尚
所司通行曉諭其一切應行典禮著照所議行十五
年十二月

諭曰明歲恭逢

聖母皇太后萬壽之年朕於新正恭奉

鑒興巡幸江南浙江省方觀民入疆考績式遵

祖烈慶典斯行東南父老共効嵩呼洵昇平之盛事惟念

江浙二省襟帶江湖程途稍遠自

皇祖聖祖仁皇帝南巡以來異數隆恩昭垂史冊迄今四十餘年朕俯從望幸之忱倍切勤民之隱前於大學士九卿等議准兩江總督黃廷桂等一摺已降旨諄切曉諭又特遣嚮導大臣兆惠努三等前往面傳諭旨務從儉約一切供頓絲毫不擾民間凡地方大吏職在旬宣自能仰體朕心遵旨辦理但恐地方有司奉行不善或窮鄉僻壤未及周知是用再行申諭各

該督撫及所屬官民人等尚其凜遵前旨共期撙節
以敦善俗以導淳風如所在行宮與其遠購珍竒雜
陳玩好不如明牕淨几灑掃潔除足供信宿之適也
經過道路與其張燈懸綵徒侈美觀不若葺屋茅簷
桑麻在望足覘盈寧之象也闌閭通衢人烟稠密正
以見懋遷有無之樂不得因道路湫隘俾遷移廬舍
或致商民失業也朕翠華所至念切民依惟期宣達
羣情勤求治道上以奉

慈顏之悅豫下以答黎庶之瞻依凡屬虛文浮費概宜實力屏除用光鉅典其扈從滿漢文武大臣官員侍衛等皆當奉公守法不得與地方官往來交際潛通餽遺兵丁以及隨從人等著該管大臣各嚴加約束經行所至不得稍有滋擾春苗遍野無得踐踏違者察出從重治罪務令白叟黃童普沾膏澤共樂恬熙副朕問俗觀風行慶施惠之至意至是年

駕發京師至山東遣官祭

東嶽

先師孔子

元聖周公廟至江南境遣官祭

河瀆

淮瀆

江瀆

駕至淮安

閱高家堰堤工至蘇州府

諭督撫等朕命駕時巡周覽風俗觀民察吏惟日兢兢
三吳尤素所廕念也粵自我

皇祖聖祖仁皇帝巡幸東南先後六舉歷今四十餘年盛
典昭垂衢謠在耳頃者入境以來白髮黃童扶攜恐
後就瞻愛戴誠意可嘉朕已疊沛恩膏廣敷渥澤惟
念大江南北土沃人稠重以百年休養戶口益增習
尚所趨蓋藏未裕紛華靡麗之意多而樸誠之風轉
有未逮夫去奢崇實固閭閻生計之常經而因時訓

俗以宣風而布化則官茲土者之責也其尚勵乃實
心以行實政無忝教養斯民之任凡茲士庶更宜各
敦本業力屏浮華以節儉留其有餘以勤勞補其不
足時時思物力之艱難事事惟侈靡之是戒將見康
阜之盛益臻父老子弟共享昇平之福朕清蹕所至
有厚望焉至浙江

上躬詣

禹陵致祭遣官祭

南鎮

海神廟

御試浙江進獻詩賦士子中選者三人

特賜內閣中書至江寧府

躬詣

明太祖陵致祭禮畢

諭督撫等併地方官加意毋許樵牧

御試江蘇安徽二省進獻詩賦士子中選者六人

特賜內閣中書過淮安

諭增築城北護城石堤

閱視黃河南北岸堤埽各工

上回鑾

臣等謹按江浙為東南重地百數十年來休養生
息土沃民稠洪惟

聖祖仁皇帝六巡江浙德意深厚昭茲史冊我

皇上克繩

祖武所其無逸自乾隆十六年以來亦復

翠華六莅

閩澤汪濊以次遞加史不勝書其在乙酉歲以前則皆

恭奉

聖母皇太后問

安視膳凡名勝所在親掖

金根以承

歡豫海內咸頌

天子之孝焉經過地方蠲免額賦有差而省會

駐蹕之區則悉免本年正供留漕艘以平市直免逋租
以省催科清理庶獄自軍流以下咸予曲宥海內

咸頌

一人之仁焉學校所以儲才也增博士弟子之額廣選
拔貢生之途諸生之進獻詩賦者

親試之其入高等者

特授以官樂育人才之典古未有也

召見地方官吏問民疾苦察其賢否而黜陟之

閱視八旗駐防及水陸標營騎射文武員弁咸晉秩一級有以公事註吏議者令其開復凡以飭官方而崇實政也舊臣之予告里居者加銜晉秩優賜之俸

加恩子孫俾列賢書其餘皆

賞賚有差八旗駐防及各州縣老民老婦並有

恩賜篤舊優老之典有加而靡已焉

念河渠海塘為東南數省要務

躬親相度審地形之高下量水勢之緩急增築隄防講求宣導發帑興工費逾鉅萬以為民生籌一勞永逸之計至於所過名山大川先代陵廟或遣官展祀或

親詣行禮以將誠敬名臣忠烈皆遣官奠酒懷柔之典洽于神人又如此臣等謹按古稱天子所至曰幸蔡邕獨斷云車駕所至見令長三老官屬親臨軒

作樂賜以食帛民爵有級或賜田租故謂之幸惟我

聖祖仁皇帝垂憲于前

皇上紹述于後

省方展義慶賜遂行歷考百王未有倫比凡在山陬海

濱莫不喁喁然望

幸惟殷而三吳之民瞻

雲就

日被

恩尤渥其為欣幸洵有名言之莫罄者矣諸典禮有應分見者則于他門互見詳之

二十一年二月

上東巡先是二十年六月

諭曰平定準噶爾捷聞以數十年逋寇迅就廓清荒服
敕寧中外蒙福迺我國家無疆之庥緬惟

皇祖聖祖仁皇帝削平三孽於康熙二十三年諏吉

東巡

親祭闕里

武功文德彪炳簡冊朕仰承

先烈集此大勲保泰持盈彌深兢業

先師孔子闕里理應恪循

成憲躬詣行禮用申誠敬且自瞻謁林泉已逾六載仰止
之念時切於懷擬於明歲春月自京起鑾恭謁曲阜
翠華所經亦以體察吏治清問閭閻行慶施惠以稱

朕法

祖尊

師之至意至是年

駕至山東

躬詣

孔廟行釋奠禮畢至

少昊金天氏陵

周公廟致祭復

詣

孔林奠酒遣官祭顏曾思孟專祠

上回鑾

二十二年正月

上奉

皇太后南巡先是二十年六月

諭大學士等奏稱江浙士庶望幸情殷請於明歲再舉
南巡一摺朕自乾隆十六年巡幸吳越迄今已閱五

載該督尹繼善喀爾吉善等均曾具摺奏請朕因西
師尚未凱旋未經允准現今膚功迅奏荒服牧寧南
省吏治民風時厯予懷而高堰堤工尤數郡生靈攸
關上年告竣以後正當親加察勘前降旨於明歲春
月展謁

孔林著允大學士等所請於禮成之後敬奉

聖母皇太后鑒興順道前往江浙以抒勤民之隱而慰望
幸之忱朕省方觀民入境考績惟期勤求實政宣達

羣情一切供頓皆出內府絲毫不以擾民地方官毋得指名儲備令衆商捐輸及扣各屬養廉察出定行嚴加究處前者巡南省時屢飭各督撫務從簡樸而所至尚覺過於華飾喧湫耳目此次行宮及名勝憩游之地悉仍舊觀但取灑掃潔除毋得增一椽一瓦毋陳設玩器城市經途毋張燈演劇踵事增華巡覽所及各督撫等果能綏輯井疆康乂蒸庶俾人敦禮讓俗慶豐寧朕自深為嘉悅若其徒事華靡致飾觀

美耗有用之財侈無益之費適以自滋咎戾甚無取
焉各督撫及所屬官民人等尚其善體朕心以副朕
觀風問俗行慶施惠之至意二十一年九月

諭曰昨歲江浙督撫等據士民呈詞籲請南巡朕已降
旨俞允後因江蘇所屬偶被災祲地方各官皆有應
辦賑務朕恐伊等因除道清塵之役轉於民事稍有
妨誤則殊非朕眷顧羣黎之本意復經特諭停止今
據兩江浙省督撫諸臣合詞奏稱西成有慶臣民望

欽定四庫全書

卷一百三十七

幸實深請以明歲再舉巡幸之典南省民風吏治時
厯朕懷茲當歲美人和之候省方觀民入疆考績正
可抒朕勤民之隱而高堰堤工告竣後亦當親加察
看著允該督等所請於明春時巡至於一切供帳頓
次絲毫不以累民地方官承辦差務寧樸勿華從前
所降諭旨甚明該督撫等其善體朕心以副朕觀風
問俗加惠斯民之至意至是

車駕發京師至山東遣官祭

東嶽

先師孔子闕里

元聖周公廟至江南境遣官祭

河瀆

淮瀆

江瀆

駕渡河

閱視河防至杭州遣官祭

欽定四庫全書

卷一百三十七

禹陵

南鎮

海神廟

閱兵

御試浙江進獻詩賦士子中選者四人

特賜內閣中書至江寧府

親詣

明太祖陵奠酒仍遣官致祭

閱兵

御試江蘇安徽進獻詩賦士子中選者七人

特賜內閣中書

回鑾復閱洪澤湖堤工至徐州

閱黃河形勢指授方畧至山東曲阜縣

親詣

先師孔子廟行禮復

詣

孔林奠酒至泰安

詣

岱廟行禮

上回鑒

二十六年二月

上奉

皇太后巡幸五臺山先是二十五年八月

諭曰明年恭逢

皇太后七旬萬壽欽奉

懿旨五臺顯通寺為文殊師利道場梵宇琳宮夙昭靈應
謁

陵成禮後順道蒞謁拈香欽此所有應行各事宜著該衙
門及地方有司照例敬謹預備至是年

上奉

皇太后謁

泰陵禮成取道幸五臺山

諭曰從前兩次巡幸五臺帳殿周廬隨常頓宿今春恭奉

皇太后前詣臺山巡幸該撫於菩薩頂側建蓋行宮並於臺麓寺旁添設坐起數楹以備安憩雖臣子之誼各盡其誠而詢其工料所費乃出自伊等養廉夫朕既不許派累百姓而各官養廉原為辦理公務及薪水之資今以之捐建行宮則甚不可著於存公項內撥賞銀二萬兩以供鳩工飭材之用

二十七年正月

上奏

皇太后南巡先是二十三年九月

諭曰兩江總督尹繼善等以河工告竣年歲豐收臣黎
望幸情殷請以庚辰之歲載舉南巡令典合詞具奏
朕惟東南河道民生時縈宵旰前者翠華再莅每切
咨詢不敢自逸茲當大工既竣澤國安瀾于焉攬轡
觀風上以慰晨時往來指畫之勤下以考在事大臣

宣化承流之績理亦宜之顧各督撫等前後奏報工
程故章如睹而嵇璜表曰修等又以親承訓示甫經
復命回京條晰數陳情形頗悉乃者大江南北年穀
頗成民氣和樂封函疊至仰見

上蒼福佑額手為南黎稱慶此意與封疆諸大吏共之猶
念積潦初除汙萊日闢正宜乘時勸諭俾瘠土並化
膏腴以培元氣已降旨各督撫勘明濱河地畝有秋
獲雖登而小民牛犁籽種不能接濟致曠土尚有未

耕者並予格外加恩官為借給使得資東作而厚西
成其果盈寧之象與歲俱增則機杼倉箱熙恬滿目
具足以佐時巡風景者不更多耶且明歲車駕臨幸
索約爾濟又再定伊犁後若左右哈薩克東西布魯
特及回部各城以次平定歸降不無覲謁宴賚之典
車馬之煩所當少恤且歲屆辛巳即恭逢

聖母皇太后七旬大壽普天同慶如於此年敬奉

安輿重臨江浙庶幾省方問俗嘉地利之畢登喜民生之

益懋於以仰悅

慈懷壽祺康豫當推

恩錫福俯慰元元望幸之忱俟臨期另行降旨所有庚辰
年南巡之奏暫停舉行毋庸具摺固請先將此通行
曉諭知之二十五年八月

諭大學士等獻歲恭逢

皇太后七旬萬壽擬於新春敬奉

安輿時巡南服俯慰士民顙祝之忱并順道閱視徐州石

堤及海寧塘工今歲大江以南在在豐收惟夏間雨水稍多河湖盛長高寶興泰一帶低窪處所頗有漫溢恐地方有司承辦南巡差務轉於賑恤事宜不能盡心經理是以諭令該督將實在情形確查具奏今據奏到高寶等處被水較重該處既現已成災亟宜以賑務為切要所有南巡應辦差務暫行停撤改於壬午春敬奉

慈輦以慰輿情仍可攬民風而昭盛典大差既經停止自

可專心辦理賑務該督等務宜仰體朕懷董率僚屬
確察災地情形實力妥辦勿使窮黎稍有失所以副
朕痼瘼在抱之意至是

車駕發京師至山東遣官祭

東嶽

先師孔子闕里

元聖周公廟至江南境遣官祭

河瀆

淮瀆

江瀆

駕渡黃河

閱清口東壩木龍

登舟巡歷河堤過揚州渡江

閱水操

諭曰向來巡幸所至地方大吏豫備燈船烟火頗覺繁
俗頃在揚州適以哈薩克陪臣入覲聊示民情和樂

之意是以聽其豫備倘蘇杭等處悉仿而行之原屬
不必朕省方觀民勤求治理即以幾暇適情則山水
名勝儘足以供吟眺之資又何事徒滋繁費為耶自
蘇州至海寧

閱海塘

御製觀海塘誌事詩示督撫諸臣至杭州遣官祭

禹陵

閱兵

御試進獻詩賦士子中選者四人

特賜內閣中書還至江寧府

親祭

明太祖陵

閱兵

御試江蘇安徽二省進獻詩賦士子中選者八人

特賜內閣中書

諭督撫等送車駕所經惟橋梁道路葺繕掃除為地方

有司所宜修補其綵亭燈棚一切飾觀文具屢經降
旨斥禁今江浙兩省塗巷尚有踵事因仍者此在蘇
州鹽布商人等出其餘資偶一點綴本地工匠貧民
得資力作以需微潤所謂分有餘以補不足其事尚
屬可行若地方官專欲仿而效之以為增華角勝則
甚非奉職之遺嗣後督撫等其實力禁止一切屏去
浮糜以崇實政如有仍蹈故習者將惟該督撫是問
駕至淮安

閱高家堰

命增築堤工五百餘丈

上命莊親王允祿等恭奉

皇太后由水程回鑾

上登陸閱視埽工至徐州府

閱黃河岸新堤遣官祭

河神廟至鄒縣

上詣孟子廟拈香至曲阜縣

詩

文廟行禮遂

詩

孔林醑酒至泰安府

詩

岱宗行禮

上回鑒

皇朝文獻通考卷一百三十七